



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Distritu Baucau
20 Outubru 2015

**JSMP halo audénsia ho autór judisiáriu no defensoria públiku Jurisdisaun Tribunál
Distritál Baucau**

Iha 14 Outubru 2015, Judicial System Monitoring Programme (JSMP) kompostu hosi diretór, ajuntu diretór, kordenador unidade hala'o audénsia ho autór judisiáriu no defensoria públiku iha jurisdisaun Tribunál Distritál Baucau. Iha audénsia ne'e, ekipa JSMP hasoru malu ho Juis Administradór Tribunál Distritu Baucau, Xefe Prokurador Distritu Baucau no Kordenador Defensoria Públiku Baucau.

Audénsia ne'e ho objetivu atu apresia apoiu no kolaborasaun servisu entre JSMP ho autór judisiáriu sira iha Tribunál Baucau no diskuti opsaun oinsa atu hametin liutan relasaun servisu iha futuru. Enkontru ne'e mós diskuti progresu no dezafius ne'ebé autór judisiáriu sira no defensor públiku infrenta iha sira nia servisu lora-lora no sujestaun atu hadiak servisu JSMP diak liutan iha futuru.

JSMP haksolok tebes tanba autór judisiáriu sira no defensoria públiku bele fo sira nia tempu atu hasoru JSMP maske sira iha akopadu nia laran. Ne'e nu'udar meus ida ne'ebé JSMP halo atu hametin liutan relasaun no koperasaun servisu entre autór judicial sira no JSMP," dehan Diretór ezeutivu JSMP, Luis de Oliveira Sampaio.

Kordenador Defensoria Públiku, Dr. Grigorio de Lima iha nia eskritóriu Defensoria Públiku, haktuir katak nia kontenti ho prezensa ekipa JSMP nian. Iha oportunidade ne'e nia esplika katak intermus rekursu umanus, Defensoria Públiku Baucau iha defensor na'in 6 (efetivu 3 no estajiáriu 3). Mesmu nune'e sira mós infrenta dezafiu kona-ba rezidensia, transporte operacional, kamera atu rekolla provas, ofisial ba IT (*Information Technology*) no fatin ba seguransa sira. Maibé tuir kordenador defensor ne'e esplika katak dezafiu hirak ne'e la sai obstakulu ba sira atu kontinua servisu ba nasaun ida-ne'e. Iha parte seluk, nia rekomenda ba instituisaun relevante sira atu wainhira diskuti kona-ba orsamentu setór justisa nian, persiza involve ka konsulta ho sira atu programa orsamentu reflète sira nia nesiedade instituisaun nian.

Rua setubal, Colmera, Dili Timor Leste
PoBox: 275
Telefone: 3323883 | 77295795
www.jsmp.tl
info@jsmp.minihub.org
Facebook: www.facebook.com/timorleste.jsmp
Twitter: @JSMPtl

Entretantu, Juis Administrador Tribunál Distritál Baucau, Dr. Afonso Carmona haktuir katak JSMP nia prezensa iha setór judisiáriu ne'e importante tebes atu hamutuk hadiak erru ne'ebé iha, nune'e sistema justisa bele dezenvolve sai diak liu. Nia rekoñese katak durante Tribunál Baucau no JSMP iha ona servisu diak teb-tebes tantu iha nivel kordenasaun julgamentu iha Tribunál Distritál Baucau no julgamentu movel iha distritu ka sub-distritu sira. Dr. Carmona, enkoraja JSMP no comunidade sira atu kontinua halo krítika hodi bele hadia no aseguara katak justisa bele funsiona diak liu iha futuru.

Dr. Carmona subliña katak normalmente se la-iha impedimentu ruma tuir lei, JSMP sempre iha oportunidade atu observa prosesu julgamentu sira, esepu ba kazu sira ne'ebé involve segredu Estadu no julgamentu primeiriu interrogatóriu.

Iha ikus, ekipa JSMP hasoru malu ho Xefe Prokurador Distritu Baucau, Dr. Alfonso Lopes no nia mós manifesta nia sentidu kontenti ho prezensa JSMP nian. Iha hasoru malu ne'e, Sr. Lopes haktuir katak atu prosesa kazu lalais, presiza iha koperasaun másimu entre instituisaun polísia liu-liu unidade investigasaun no ministériu públiku nune'e kazu sira bele aselera lalais. Aleinde ne'e nia mós haktuir katak presiza iha prokurador espesializada iha área krime ruma atu aseguara rejultadu ne'ebé diak liu.

Liu-tan nia haktuir katak, tanba Jurisdisaun Tribunál Baucau nu'udar jurisdisaun ida ho kazu barak, tanba ne'e dalabarak sira la-rezerva tempu ba diskansa, inklui tenke servisu iha tempu finde-semana. Mesmu nune'e, tanba nu'udar instituisaun judisiáriu ne'ebé reprezenta estadu atu garante justisa ba públiku, sira sempre haklosok ho servisu ne'ebé tulela ba sira.

Planu hasoru direktamente autór judisiáriu no defensoria públiku sei kontinua ba iha jurisdisaun seluk hanesan Suai no Oe-Cusse.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org